



Assam: CM Himanta Biswa Sarma-i
Uriamghat semdang

World University Games: Seema-i
5000m nung silver medal angu



National Highway-29 nung gari mesenzütsü tuyur

Dimapur, Chiteni/July 27 (TYO): Nüburtem kumzüka ayutsü mechi tang nungi tenzüka tarutsü nung osang magütsü tashi National Highway-29 nung gari kata mesenzütsü tenokdangba agütsür, ta Kohima district administration sangdong ka ajanga metetdaksü.

KMC dumping site anasa lenmang kanga mejungi lendong ajurutsüsa lir aser tang ama tzüngsang-mopung mejungra

alinen alitsüsa lir, ta sangdong ajanga ashi.

Light motor vehicles tem Jotsoma bypass leni senzütsü aser danga district temi aoba gari, para-military gari, pick-up garitem aser heavy & mid-size commercial passenger vehicles tem densema heavy vehicles ajunga Peducha bridge Tsiesema (10th mile) lenmang len senzütsü.

Iba totuyuba nung aibelener nem tapet ozüing agi merenshitsü, ta sangdong ajangasa ashi.

Nagaland atema DCCCs pezü amenoktsü melar

Dimapur, Chiteni/July 27 (TYO): Nagaland nung cancer care services nung jangja-jangja asendenshitsüsa Government of India-i oncology services ulushiba nung shilem ka ama Phek, Wokha, Mon aser Tuensang district tem nung Day Care Cancer Centres (DCCCs) amenoktsü melaogo.

Financial year 2025-26 atema DCCCs tasen 297 amenoktsü Centre-i melaba nung Northeast nunga state aika

rongnung Nagaland dena lir.

PIB osang ka ajanga ashiba agi, decentralising cancer treatement aser chemotherapy tajungba kumdaksütsü nükjidong nung DCCCs ya tang aliba ki o jen nung ajemdaker district hospital tem nung amenoktsü.

Unit shia sen 1.49 crore asütsü aser iba senotsü teyari ya National Health Mission kübok State Resource Envelope nungi agütsütsü.

DNSU-i mejangjaba immigrants nem ki magütsütsü ayongzüker

Dimapur, Chiteni/July 27 (TYO): Dimapur Naga Students' Union (DNSU) ajanga nübur ajunga aser talisa ali kiburtem dang kanga saksalema ali aser ki nung nisung lidaksütsü ayongzüker.

Deobarnü sangdong ka agütsüba nung, mejangjaba immigrants nem ki o jen para agütsüba onoki khenyongi magizüker aser iba ama inyakyim ajanga Naga nunger maitsü, ali temeden aser nütsüngsük asoshi timtem tulu lir, ta DNSU ajanga ashi.

Tang tensa ya kanga mejungi lir, anungji Dimapur nung ali kibur ajunga dang tenants junga mejangjai pei li/ki nung para lidaksüba yimya tangsa anentsüla, ta ashi.

Yamaji meinyakra bendanger tem mazüokteti nungpoka aittsü aser Inner Line Permit (ILP) system aser akhi mapang nungi ali amshiba yimya nung timtem ajurutsü, ta parnoki ashi.

"Ali kibur tem dang khen asoshi senotsü ajangzüksü mebilemi Naga nunger sobaliba wazüka ayutsü aser long-term security nung temulung agütsütsü ajungshir," ta sangdong ajanga ashi.

Ali kibur temi documentation

shidak maliba nisungtem anioka pei ki/ali nung para agüja lidaksüba putetra onok nem osang agüjang, ta nüburtem dang ayongzüker.

Iba amala osangtem indang-indanga pei alidak ketdangsür nem sangoktsütsüla, mesüra DNSU den mobile number +91 7005876566 aser +916009812596 ajanga tongteprateptsü akok.

Maneni DNSU-isa par kübok tribal units shia dang volunteers nisung 100 renema alitsü metetdaksüogo.

"Item volunteers ya mashi mapang Inner Line Permit dak sendakba tensa balala nung yariteptsü asoshi renema alitsü. Maneni item units ya ILP ozüing shidak mapa kuma amshitsü merangba nung sorkar aser tim ketdangsür tem den yariteptsü renema alitsüla," ta ashi.

DNSU-isa state sorkar dang ILP cell balaka amenoktsü nenshia ayongzüka liasü.

"Iba ama cell yagi inyakyim tajungba bentettsü, enforcement tashi ulushitsü, aser state telungi nisung tasen aitba ketdangsüba aser aziokba nung tali tajungba rangloka Naga nunger maitsü aser ali temeden wazüka ayuba nung tali tashi itshitsü," ta DNSU-i ashi.

Illegal immigrants kata Langpangkong litsüi maitdaksütsü: LKM

Dimapur, Chiteni/July 27 (TYO): Tang Assam nung illegal immigrants tem meindokba dak sendakba nung Langpangkong Kaketshir Mungdang (LKM)-i kanga tsürena bilema item tim masüba nisung asen Naga lima-i maitdaksütsü tangatetba nung jelia ADC Tuli den mensem amenba den külemi Watiyongpang Police Check gate semdanga Police tem den tim o agi ajungshitepa liasü.

Administration ajanga kanga meranga tim-tesü mapa inyakba ngua pelaba LKM ajanga lemsatep. Iba den külemi illegal immigrants ya tarutsü nung asen nübur asoshi miim tulutiba ta angateta kanga süoki-yia bilema illegal immigrants kata tzükong telongi maitdaksütsü asoshi administration den jembiteba liasü. Maneni, Watiyongpang

Police check gate nung kisüing masü saka Assam den arrtsüa aliba tesem ajaklen Police yoka meita reprangtsü ajungshitep.

Parnoki Watiyongpang Police Check gate semdanga pei akokba mapa tim nung yakyaka inyakyimtsü Police tem ajungshia liasü. Tim masüba nisung (IBI) mesüra ILP card shidak malir tzüma-longmar kata iba gate alema tzükong telongi maitdaksütsü kanga kümdanga mittsü shia liasü.

Tim masüba illegal immigrants mesüra ILP shidak mali tzükong telongi aitba ngura Langpangkong Kaketshir Mungdang ajanga tapet mera agitsü, ta Administration aser Police tem dang parnoki sangoktsü. LKM ajanga iba dak sendakba nung Administration aser Police tem den külemi yariteba lanu putu asoshi

inyaktsü jangrar aser renema lir ta mensem nung shisem.

Maneni nübur karitanga lanu putu asoshi mebilemdangi tzükong nung tim masüba ILP shidak malir mesüra illegal immigrants aniketba osang angashira mesüra ngura, LKM Office ajanga tapet mera agitsü iba osang ajanga jelia ayimoktsür, ta LKM ajanga sangdong nung ashi.

LKM dak sendaka aliba yimtsüng unit ajaki pei yimtsüng nung tim masüba tzüma-longmar mita reprangtsü iba osang ajanga sangoktsür. Langpangkong nung aliba village councils, ward unions aser nübur ajaki item tim masüba nisung mita alitsü asoshi LKM ajanga ajungshir, ta LKM tir Imlinok aser tongti zülur Meyitongpang ajanga osang benertem den lemsatep.

State sorkari pei litsü-lika wazüka meyteter: NSCN/GPRN

Dimapur, Chiteni/July 27 (TYO): Assam nung illegal immigrants tem meindokba ya meimlai aliba ka atalokba masü saka British nungeri lazüksü ta shia Naga nunger den shisa magitepi pei administrative ajung asaa Naga nunger li belena tizü nung 'Disturb Area Belt' (DAB) ta nüngja agütsür mükazüka aliba Naga nunger li amokbangtsü asoshi sentong kanga junga yur inyakba maparen ka lir, ta NSCN/GPRN sangdong ka ajanga ashi.

Assam sorkar nung melentema yimsü süa aruba party temi ozüing alema asen li amokbangtsü tebilemba nung tanem-tanemi küm aika north-eastern states arütsülen mangatettep alidak Illegal Bangladeshi Immigrants (IBI) lidaksütsü ajungshia aru.

Anungji IBI temi ali agia aliba azüngtetba tenüing nung Assam sorkari Nagaland sorkar ajembang aser Naga ancestral areas amokbanga 'Disturb Area Belt' ta ajaba nung Assam police tem teti asoshi amenodaksür.

Assam sorkari status quo nung jangja-jangja aibelenogo aser IBI ajanga ozüing alema ali agir ta tenüing atemer par shidakba tebilemba miimbanga ayu. Assam state ya interstate boundary aliba states timba den arütsü mangatettep lir ta metettsüla, ta NSCN/GPRN sangdong ajanga ashi.

Yimten yimsüsür temi

kechiba tensa majungdang semdangba sülenbo arütsü nung aliba tesemtem mesemdangi yutsü alinung komaser Assam police-i ozüing alema Naga nunger li rakzüka nungi kumzüka yutettsü ta Nagaland sorkar dang Naga nungeri asüngdangtsüla.

Assam sorkari iba ama maparen inyakba nung Nagaland sorkari telangzüba agütsüba ajunga agi bodyguards ishika den yimten yimsüsürtemi noksa tangoktsü asoshi arütsülen tesemtem semdang yutsüba ya dang asütsü, ta ashi.

Tanü tensa reprangdangra, Nagaland police, Nagaland Home Guards aser danga personnel tem Naga nunger rongsenketzüing indoka parnok takar akumtsü asoshi shishilempaba jilattem nung posting aotsü ang tokteper.

Tang rongdaka nüngdabaji aser Naga nunger litsü-lika arütsülen security tashi itshitsüba ya lir. Department timba nung staff tali lir ta ashishia kazütsü dang nungbo Police, Home Guards, Village Guards tem ang tali shima asen nübur aser asen li wazüka ayutsü asoshi arütsü leni yokba kanga agi tajungba asütsü, ta NSCN/GPRN ajanga ashi.

Nagaland sorkari ya par ket nung aliba tashi aser rongsen amshia Naga nunger aser Naga nunger li kumzüka ayutsü melen asen nisung (Naga nunger) den

raratsü aser ajemrepa yutsütsü asoshi specialized teams (SOT, STF, etc) ang tali yanglitsü renema aser tali rangloka lir amai lir.

Nagaland sorkar ya ali maka online Digital State ka ama ang alitsü meranger asü?

Nagaland sorkari pei li wazüka ayutsüba tasa khenyongi melenshitsüla aser akhi tejen otsü jembia yimjak nung tsüngsanga mekazüi Naga nunger tejangraba mezüing südaksütsüla, ta ashi.

Naga nunger li kumzüka ayutsüsa state security dak tashi maliba aser policy tasüa masü takuma masü ta aliba atema tang aliba state political party kisüing tenüing asenla masü, saka taoba mapang yimsü süa aliba political party ajunga dena lir, kechiaser iba benja-benno nung parnok ajak teka lir.

Melentepa yimsü süa aruba political party temi sübo-süyima yutsüba ajanga tanü iba tensa ya ajurur.

Asen otsüla-oboula nunger mapang nungi liyonga aruba Naga nunger li kumzüka aser wazüka ayuba nung Naga political groups tem atsükshia melie nokdaksüla aser tax mesüra tenla-tenji kisüing meshia mesüra meshitsü meranga malitsüla. Asen li nungi asen nüburtem piladaksüra asenoki komala linük ka aginer ta Naga nungeri süoki ia bilemdangtsüla, ta NSCN/GPRN sangdong ajangasa ayongzüker.

PMMVY enrolment drive ka agiogo



Dimapur, Chiteni/July 27 (TYO): Pradhan Mantri Matru Vandana Yojana (PMMVY) dak sendakba nung enrolment drive ka den repsema Beti Bachao Beti Padhao kübok tetsürtem atema amenoktsüba welfare scheme tem dak sendakba nung awareness sentong ka July 25 nü CDPO Office, Chiephobozou, Kohima nung agiogo.

Tetsürtem dak rangloker amenoktsüba scheme tem indang jembiba mapang Kesoneinuo Kense Gender Specialist, DHEW Kohima-i, PMMVY ya India sorkar indang conditional maternity-benefit scheme ka lir, koba Ministry of Women and Child Development-i Anganwadi Services sabang amshia, mashisa aliba aser mama yondakja aliba tetsürtem nem parnok mashisa aliba mapang aser tanur asoba sülen chiyongtsü tajung chidaktsütsü atema aser anogoshia taah akoksaba mesemtsü atema senotsü teyari tera agütsür.

Lai ashiba agi, item scheme tem agitettsü temsü alirtem rongnung Scheduled Castes aser Scheduled Tribes nungi tetsürtem, tetsürtem shirnok tera (shilem 40) mesüra khenyongi mata mabensa lir, BPL/ National food Security Act 2013 ration cards bena alirtem, Ayushman Bharat kübok

Pradhan Mantri Jan Aarogya Yojana (PMJAY) nung tetsürtem beneficiary tem, e-Shram card bena aliba tetsürtem, Kisan Samman Nidhi kübok beneficiary tetsürtem, MGNREGA job card bena aliba tetsürtem, tetsürtem shirnok küm nung sen lakh 8 dak tajemba aazüker, mashisa aliba aser mama yondakja aliba tetsürtem, Anganwadi worker aser teyarirtem, ASHA worker tem aser Centre sorkari temelaba agütsüba tanga category tem densema lir.

Kasa mapang nung tajangzük ya mezüngbuba tanur ana asoba atema agütsür aser tanabuba tanur ya tetsür asütsüla, mashisa aliba aser mama yondakja aliba tetsürtem shirnok central mesüra state sorkar mesür public sector nung inyaker parnok iba scheme küboki maittsü aser ano ibala mesükba tajangzükba agia aliba beneficiary tem nema iba tajangzük magütsütsü. Beneficiary kati tanur asoba sülen anogo 270 tashi nung PMMVY nung züngoksemtettsü.

Sakhi- One Stop Centre (OSC) indang jembiba mapang Psycho Social Support Counselor OSC, Kohima, Medochiinuo Chielie-i ashiba agi, OSC ya mepetmesü nung aliba tetsürtem nem medical,

legal, khen atema tejenokdak, police teyari, psychological aser counselling support amala service tem agütsütsü atema benokba lir.

Laisa, mepetmesü agi kongshir alirtemi parnok chirnurtem (tetsür ajak aser tebur arishi küm 12 tashi nung) den külemi OSC nung anogo pongu tashi khen atema jenoka litettsü, ta ashi. Maneni mepetmesü nung aliba tetsürtemi toll- free women helpline number 181 dangi call süa teyari meshitettsü aser 181 dangi call asüba mora +91-9485239098 dangi call asütsü metetdaksüogo.

Sentong tembangba sülen Chiephobozou block kübok yimtsüng balala nungi beneficiary temi online service balala agiogo, kong District Administration aser Department of Social Welfare na longjemer tetsür tanur arishi küm 0 nungi 5 tsüngda alirtem Aadhaar nung züngoksema, Department of Post-i achaayanga Indian Post Payments Bank (IPPB) account tem lapokba densema lir.

Iba awareness sentong ya Kohima District Administration aser SANKALP - District Hub for Empowerment of Women (DHEW) na longjemer Beti Bachao Beti Padhao (BBBP) nung shilem ka ama ayongzükba agiogo.

Kiphire yimtsüng nung Bypass lenmang lapokogo

Dimapur, Chiteni/July 27 (TYO): Kiphire Deputy Commissioner Temsuwati Longkumer, NCS-i, Kiphire yimtsüng nung Bypass lenmang July 24 nü lapoktsüogo.

Sentong nung o jembiba mapang DC Kiphire-i ashiba agi, Kiphire yimtsüng nung Bypass lenmang ya Kiphire yimtsüng aser Kiphire jila atema tongtibang lenmang ka akümtsü. Paisa, Council fund ajanga iba lenmang kanga takok ngua yanglutetba atema Kiphire Village Council aser GB tem nem tenüngsang agüja liasü.

Deputy Commissioner-isa, pai line department tem den sensaksema takokba tashi parnok nem teyari agütsütsü

nangzük, kechiyong kilentsü junga meyanglui lenmang ka mapang talangka amshitsü tamakoktsü, ta ashi.

Iba lenmang ya Kiphire yimtsüng atema dang masü saka Kiphire jila aser temeket nung aliba tesemtem atema lir ta shia DC-i, kong lenmang lir idakji terenlok lir ta ashi aser Kiphire yimtsüng aser jila nung alirtem dang sorkar dang matai longjemer terenlok maparen balala benoka inyaktsü ajungshia liasü. Paisa, iba lenmang lapokba nüngshilong sayaja liasü.

Sentong nung mejeta jaoker ya ADC Kiphire, Longdiba L Sangtam aser ketdangsürtemi meiner oa liasü. Sentong ya Rezila lenisüba nung agi.

Gogoi-i Barak Valley tebilemstü parliament nung benoktsü nangzük

Guwahati, Chiteni, July 27 (Agencies): Assam Pradesh Congress Committee (APCC) tir Gaurav Gogoi-i Deobarnü, Barak Valley den sendaktepba lenmang aser train lenmangtem tamajungba küma aoba indang süoki ia bilemba lemsatepba den iba ken o ya tang tagidak aliba Parliament session nung benoktsü ta tenangzükba agütsüogo.

Hailakandi nung osangbenertem den sensaksema mapang Gogoi-i, Barak Valley kübok district tem; Cachar, Karimganj, aser Hailakandi nung infrastructure tem tamajungba küma aoba indang jembiba den sorkari iba tesem sentoka toktsüba atema aitsüogo. Iba tesem nung nisung lakh 50 shi alir.

"Barak Valley nung lenmang ajanga tesendaktep kanga mejungi kümogo. Onoki Parliament nung iba ken o benoktsü aser Union Minister Nitin Gadkari dang tangsa tang jenjang agitsü mepeshitsü," ta Gogoi-i ashi.

Gogoi-i, National Highway 6 (NH-6) indang mejeta jembiba aser iba ya nüburtem taküm liyonga aotsü asoshi tongtibangtiba lenmang ka mepetmesü nung aliba ka ta

ashi. Paisa, lenmang nung tapok aliba aser anenzüka or aliba ajanga highway kübok tesem aika nung gari senzü mejungi kümogo. Iba lenmang nung senzürtem Silchar-i aotsü atema km 50 dang süaka ghonda asem dak tema agir, ta ashi.

Gogoi-i ashiba agi, lenmang majungba ajanga Barak Valley nung alirtem dang masü saka Tripura aser Mizoram nung alirtem daka kongshir, shirnok India nung tanga tesemtem den sendakteptsü atema iba lenmang dak metaloker alir.

Maneni pai, Badarpurghat nung mapang talangka nungi flyover ka yanglutsütsü akhangba indang metetdaksü, kong lenmang majungba aser gari tali nongtepba ajanga nüburtem kanga menomeyangdaksür, ta ashi. Paisa, gari senzusenpong shitak achaayang masüba ajanga nüburtem aiben train memeneper, ta pai ashi.

Gogoi-isa, Barak Valley tzmetsüng agi mapangshia kangshiba indang jembiba aser iba ya humanitarian crisis ka ama magizükba atema sorkar aija liasü. Pai, iba tesem nung sorkar indang healthcare facility tem kanga majungba aija liasü.

Assam aser Meghalaya nung mangatettep adok

Guwahati, Chiteni/July 27 (Agencies): Honibar aonung menor Meghalaya nungi nisung kari sorkari amenoktsüba arrtsü tongshi ka raksatsüba sülen West Karbi Anglong kübok Assam aser Meghalaya arrtsü nung tensa mejungi lir.

Local source balala ajanga ashiba agi, Upper Khasi kübok Lapang tesem nungi mejangjaba nisungtemi Tapatth tesemi ai, aser state ana tsüngda arrtsü jangjatsü atema India sorkari amenokja aliba arrtsü tongshi ka raksaja liasü.

Taoba anogo ana tashi tatalokba balala atalokba sülen iba ya ataloka liasü. Khasi nunger teloktem asütsü ta temulung melemi bilemertemi Assam nung alutem raksaja aluyimertem akoksadaksüogo.

Tang tatalokba nung arrtsü tongshi ya state ana bendangba ayong ka anasa amenoka lir, kong mapangshia mepetmesü adoka arudar. Iba tesem nung alirtemi, ozüing alema maneni inyaksangshiba ajanga yimjung raksaba aser arrtsü nung alirtem tsüngda tensa mejungi akümba tebilemstü lemsatepogo.

Mepetmesü adokba osang angazükba sülen ketdangsürtemi tensa mejungi aliba tesemtemi security forces talila yokogo.

Assam aser Meghalaya na tsüngda arrtsü nung mangatettep aliba mapang talangka mebeteti arudar, aser tang ama mepetmesü adokba ajanga state ana tsüngda tesendaktep nung tetsükdaksü adoker.

AR-i Cycle Campaign: Sunday on Cycle ayongzükba agiogo



Dimapur, Chiteni/July 27 (TYO): Saisabong, telongjem aser fitness benjungtsü nüngdem nung Assam Rifles-i Dimapur nung July 27 nü Khelo India Scheme indang FIT India Movement pusema "Cycle Campaign: Sunday on Cycle" sentong ayongzükba agiogo.

Iba sentong ya lispourtem aser talisa lanurtem anema alitsü asoshi shitemang arakzüa inyaksangshiba sobaliba ka

tentetdaksütsü nükjidong nung ayongzükogo.

Sentong nung kaketshirtem, asayartem, Assam Rifles personnel aser local lanurtem parnok semerpongui shilem agia liasü. Parnoki fitness aser anema alitsü asoshi libaliro ka sübatsü indang osang prokshia yimti süa pei cycle nung mener senzüa liasü.

Iba sentong ajanga Khelo India ya saisabong sentong ka

dang masü saka, linük ajunga nung nüburtem ajak anogoshia libaliro nung asaya aser fitness bendenloktsü atema ajungmesoba inyakyim ka lir ta jangjashitsür.

Iba campaign nung, medical team tem densema lir, hydration point tem amenok aser lenmang tepeyong sentong nung shilem agirtem nem teyari agütsütsü atema support vehicle tem yoka liasü.

Iba sentong nung shilem agiba atema pelaba temaittsü aser parnok ajungmesotsü atema cyclist tem nem kuli kaket agüja liasü.

Iba sentong ajanga Khelo India indang nükla 'Sports for Peace and Development' tali akangshitsür aser lokti tali longjemdaksüba den saisabong ajungketer aser saisabong tashi ajanga linük longjemdaksür.

Mansa Devi tekülem kidang nisung 6 ajemset



uly 27, 2025 anepdang Haridwar nung Mansa Devi tekülem kidang lendong atalokba sülen tangokba noksa nung angur.

Haridwar, Chiteni/July 27 (Agencies): Amongnü anepdang Haridwar nung aliba Mansa Devi tekülem kidang nisung trok ajemset aser aika yiruogo, ta ketdangsertemi metetdaksü.

Tekülem kidang lokti tulu nungtepba ajanga iba lendong ataloka liasü.

District Magistrate Mayur Dixit-i, "Lokti nungi nisung kari, electric wire tokdangdar ta olulu prokba nungi iba lendong atalok, ta noksa aser videos ajanga jangjaogo. Iba lendong ataloktsüsa olulu prokerji onoki bushitsü. Iba tatalokba bushisüngdangtsü," ta metetdaksü.

Mansa Devi temple trust Tir, Mahant Ravindra Puri-ibo, "Iba tekülem kidang nisung ka alangba nungi iba lendong atalok. Nisung kar electric agi puseta asü ta asüba osangji tai. Onoki takoksa anguba kibongtem yaritsü. Onoki police dang teyari meshiba ama police arua tenokdangba-a yua liasü, ajisüaka lokti tulu adenshi aser kar ajuchir alangba ajanga iba lendong atalok," ta metetdaksü.

State disaster management Centre-ia, anepdang 9:00 ako nung atalokba lendong nungji nisung pongu kanga mejungi yiru aser nisung 23 tera yiru, ta metetdaksü.

Osangbenertem den jembidang Haridwar Senior Superintendent of Police, Pramendra Singh Dobal-i, iba

lendong atalokba sülen yirua alir nisung 35 hospital-i anir ao, saka nisung trokbo mekümzükteti süogo, ta metetdaksü.

Dobhal-isa, "Onoki iba tekülem ki administration aser trust den jembio. Tarutsü nungbo item ama tatalokba malitsü atema SP City, nodal officer shima pa nem tashi agütsüogo. Sawan ita nung maneni tekülem kidang lokti tulu adenshitsü, anungji onoki security akangshitsü. Tanü tatalokba atema ken o ka benokogo," ta metetdaksü.

Iba osang angashia Ato kilonser Narendra Modi-i X ajanga, "Haridwar, Uttarakhand

nung aliba Mansa Devi tekülem kidang nisung aika ajemsetba osang angashia jashir. Takoksa angur kibongtem den ni mangyim jashi lemsateper. Yirua alirtem tekeraba nung aneptsü sarasademtsür. Ketdangsertemi takoksa angurtem den yaritepdar," ta metetdaksü.

Uttarakhand Chief Minister Pushkar Singh Dhami-ia X ajanga, "Haridwar nung aliba Mansa Devi tekülem kidang lendong atalokba osang angashia jashir. SDRF Uttarakhand Police, local police aser rescue teams aika iba tesem jagi oa yaritepdar," ta metetdaksü.

Maharashtra nung tebur 14,000-i tetsür scheme nungi senotsü angur

New Delhi, July 27 (Agencies): Maharashtra nung tetsürtem atema tenzüka scheme 'Ladki Bahin Yojana' nungi tebur aikati taila documents amshia senotsü teyari agidar, ta bushitetogo.

Iba scheme kübok kanga sensaker tetsürtem nem ita shia sen 1,500 agütsür.

Iba scheme ya tetsürtem atema dang lir saka tebur aikati taila documents amshia iba scheme nungi teyari agibaji Women and Child Development Department (WCD)-i

bushitetogo.

Maharashtra nung Dy. Chief Minister Ajit Pawar-i, "Maharashtra sorkar indang Ladki Bahin Yojana nungi senotsü teyari agiba teburtem nem temerenshi agütsü aser iba scheme kübok parnoki agiba senji tanaben meshitsü," ta metetdaksü.

Iba scheme ya yaküm August ita nung tenzüka liasü. Iba scheme tenzüka sülen November ita nung state assembly election nung BJP-i aniba Mahayuti teloktepi takok ngua liasü.

Bihar draft electoral roll nung voters lakh 65 züngdokogo

New Delhi, Chiteni/July 27 (Agencies): Taküm November ita nung Bihar nung assembly election agitsü lia state nung SIR kübok voters crore 7.89 nungi crore 7.24-i enumeration form submit süa liasü, ta election ketdangsertemi metetdaksü.

Election Commission-i sangdong ka ajanga, Bihar nung draft electoral rolls nungi voters lakh 65 züngdokogo; item rongnung süadokba voters lakh 22, tangalen oa alir mesüra mejangjaba nisung lakh 36 aser khen dak tali tenü agüja alir lakh 7 lir, ta metetdaksü.

SIR mapatong ya "No Elector Left Behind" omen nung ajemdaker agi, talisa tang mezüng vote agütsüsupurtem, jila nung aliba nütsüng, tangalen nungi arua alirtem, kanga tantsür tamburtem aser matamabensartem dak rangloker agi.

Iba mapatong nung tongti

yimtenren party 12 pronglai shilem agia liasü.

State nung enumeration form lakh 29 bo ECI website aser mobile app ajanga agüja liasü.

Taküm October 1 anogo tashi nung arrshi küm 18 ajungtsüpur lanurtem danga August 1 nungi September 1 anogo tashi nung tenü agüjang ta ajungshir.

Election Commission-i, "August 1 nungi September 1 tashi Election Commission-i Bihar tesem ajaklen special campaigns agitsü aser iba mapang nungji vote agütsütsü temsüa alir lanur shinga mezüngdoktsü atema tenü züludentsü," ta metetdaksü.

Tang Bihar nung draft electoral roll tasenbaji August 1 nü sangdongtsü. Iba sülen tenü bendenloksü, teindoktsü mesüra metongshitsü adokra ita ka tsüngda metetdaksütsüla.

OFFICE OF THE
MONGSENYIMTI STUDENT'S UNION YISEMYONG
P.O: Chuchuyimlang, B.P.O: Yisemyong, Pin No. 798614
Mokokchung, Nagaland.

Tenüngsang Agütsür



Mongsenyimti Student's Union Yisemyong ajanga tenüngsang ola ayimoktsür.

Wb. Pongensashi Pongen aser Wt. Sashimenla Jamir na jabaso **SP. SANIPONG PONGEN**, Nagaland University UG (CBCS) tatidang nung Top 5 (CGPA 8.19) Department of Economics, Jubilee Memorial College, Mokokchung nungi takok tulu ngutetba asoshi MSUY ajanga tenüngsang aser tetushi tulu agütsür. Tarutsü anogotem nunga tulusang Tsüngremi pa taküm aser wadang ajak nung takok tulu lidakjang ta sarasademtsür.

Sd/-
Sp. Marsashi Ozüküm
Tir, MSUY

Sd/-
Kr. Sentijungla Jamir
Tongtüzülur, MSUY



WORLD HEPATITIS DAY 2025

- Temesen Cancer adokdaksüba tongti kuliji Hepatitis B & C lir.
- Ajaki longjemer inyakba ajanga Hepatitis samatsütettsü.

"Asenoki Iba Ya Raksatsüdi"

ANGATI SERVICES



DISTRICT HOSPITALS ASER COMMUNITY HEALTH CENTERS AJAK NUNG HEPATITIS B&C **SCREENING & TREATMENT** SÜTETTSÜ



DISTRICT HOSPITALS AJAK NUNG HEPATITIS B&C **SERO-POSITIVES ATEMA VIRAL LOAD TESTING** SÜTETTSÜ



GOVT. HOSPITALS NUNG HEPATITIS B POSITIVE TETSÜTEMI ASOBA KINÜ TANURTEM ATEMA **HBIG** LIR



TANURTEM, HEALTH WORKERS ASER HIGH RISK GROUPS AJAK ATEMA **HEPATITIS B VACCINES** LIR

**IBA RARA YA
ALIMA RARA,
INYAKTSÜPURTEMJI
ASENOK**

**28 JULY
2025**

OSANGTSÜSANG TALI JANGJATSÜ ATEMA Anasatiba health center nung Chief Medical Officer's Office den tongtepang.

FOLLOW US
@nhmnagaland
X @NagalandNhm



TIR YIMYIM YIMOBILEM (EDITORIAL)

DIMAPUR

TENTONÜ

CHITENI 28, 2025

Tatar senden nung rongrong

India nung tatar hoho senden sünep-sünepa magitetsüsa akümba ya linük asoshi takoksa dang masü saka tangar alima kintem tsüngdanga taaktsüka lir. Aji oda, tang temendak tatar hoho Lok Sabha aser Rajya Sabha na prongla nung Congress teloki aniba opposition purtemi Bihar nung tang Electoral Roll reprangshiba sentong Special Intensive Revision (SIR) indang onük ya benoka mejembi dangbo tanga onük kata benoka mejembidaktsütsü ta tatar senden nung ayimtenba ajanga senden magiteti taoba Hokolbar nü nungi tanü July 28 tashi tatar hoho senden anena lir. Atangji, tatar hoho nung nübortem asoshi nüngdak aika asüngdangtsüla lir aser government nung alirtemia parnoki inyaktetba aser inyaka aotsüba indang aika ashitsü renema alitsü, ajisüaka itemji asüngdangtepa ken o lemteptsü melen tatar hoho agi tanur tashi mangar alidak class takdang amai ka dang kümer, shibai kechi jembiar mangatetsüsa rongrong adokbaji ajak asoshi kanga tia majung atalokba mapa ka asütsü. Atangji, India tatar hoho senden nung ken o benoka mejembitetsüsa rongrong adokba ya tang tasen masü saka küm ishika jakdang BJP purtem opposition nung alidang tenzükba mapa agi tanübo tatar senden nung opposition purtem asoshi sobaliba amaika kümogo. Küm ishika jakdang, Congress teloki aniba government-i yimsü asüdag BJP teloki aniba opposition teloki maparen aika nung Congress government nung alirtemi ochimashi mapatem inyakba aitsü aser tatar senden nung item onüktemji benoka mejembidangbo ta takangba agüja tatar senden nung ayimtenba tanga tayimdak amai angashir. Kasaji, Congress teloki aniba government nung Dr.Manmohan Singh, Ato Kilonser asüba mapang, BJP teloki Manmohan Singh dang ola madokba ato kilonser ta luja jembiba mapanga aiben liasü. Ajisüaka, tanübo jet ta meyiper Congress teloki aniba opposition purtemiang Ato Kilonser Narendra Modi dang ola madoki linük yutsür bendanglen dang jajaba Ato Kilonser ta luja jembiir, kechiyong pai, talisa, Manipur nung pei kidanga tetsübu agi melitetsüsa kin o kin na tsüngda lendong patetka to adokyonga tang tashi kena oa mesemdangi yuja lir. Atangji, ibajjibo kangasa tezüdak matang aser hau ta aria bilemba shisatsü atenba nisung masütsü. Iba amaji yimten telok aser lenirtem rongnung shinga tabensaba mali, ajak dak pei pei yari tashimait aser mekokmein lir, iba jagi kijai yimsü masür saka nübortem nem yimsüsür shimdaktsür. Iba nükjidongji yimsüsürtem rongnunga kati mulungba nung masü saka ajaki masüyonga teimbai mulungba nung linük aser nübortem asoshi telemtetba agia aotsü tashi agütsür. Item mapatemji jembia latettsüba tesemji Tatar Hoho lir, anungji tatar hoho nung nübortem asoshi jembitsü atema nübortemi pei pe constituency nungi tatar kaka shimer yoker. Atangji, item tatartemji tangari jembiba kisüng angai yoker-a masü mesüra tatar senden nung ayimtena rongrongtsü asoshi yoker-a masü saka linük aser nübortem tanü aser tarutsü nung nüngdakbatem reprangteta jembitsü asoshi yoker. Aji oda, tatar senden nung amentsü maongka anguba tatar ka atema khuret tulu lir, kechiyong pa mesüra laji pei asoshi alir masü saka nübortem asoshi alir. Iba maongka aser khuretji meteta tatar kati inyaktsübaji kanga tongtibang lir. Atangji, tatar ka khuretji government nung alir mesüra opposition nung alir ta masü, ajak kasa nübortemi shimtetba yimsüsür, anungji kati ka akümtsübutepa yimsü asütsübaji kanga tongtibang lir. Aji oda, government nung alirtem asoshia tatar senden nung opposition bang makok, senden thitempet thitemtsüsa atalokbaji junga yimsü asüba kuli aser tamaitsubo masütsü. Kasaji, opposition nung alirtem asoshia tatar senden nung nung ken o lemtepsü mapang magitetsüsa ayimtena rongrong adokba jagi government nung alirtem teinyaktsü meinyaktetsü ta masü saka government nung alirtembo parnok nem nübortemi agütsüba tashi amshia parnoki bilemba aser atongba sentongtembo arürtepa benokli agizükli ta aotsü. Idangji, opposition purtemsa akoksatsü aser opposition akoksabajia nübortem akoksar asütsü.

OLEMSABANG

Sorkar aser Arogo "Service Rules" medemdangba (Research findings)

A. M. TOSHI JAMIR (Dimapur)
Retired DIRECTOR (GoN)

(Yashi adok nungi...)

AROGO : Arogo ajanga Ordained ser mapa nungi anener tem nema senotsü teyari itashia agütsütsü atema Mungdangi temalen renemba züngshiogo. Ibaya "2014 kum Ao Baptist Arogo Mungdang-i lemtetba:ORDAINED MINISTERS PENSION PLAN:mapa nungi anener aliba Ordained Minister ajak nem Ordination move asüba Arogo-i ita nung Rs.3000 bo-sa agütsütsü. Pa/La süadokra kinungtsü /kinungbo nem Rs.2000 bo-sa agütsütsü agizuker." Koba tashi takok ngua benshia odagi ibaji Headquarters nungi asadangtsu nungdak.(required evaluation). Arogo kar nungbo Pension agütsütsü aser re-employment tenzüktsü jembibasa angashir. SORKAR/AROGO/MUNG DANGTEM NUNG TENZÜKBA MAPANG TIM MESÜI TOKLANG TENZÜKERTEMI PEI AJANGZÜKLEN TASHI AMSHITSÜA AKOK (may abuse or misuse power by the Officials in power/position):Iba olen ya British Historian Lord Acton-i ,nineteenth Century nung yamai zülua toktsü:"ABSOLUTE POWER CORRUPTS ABSOLUTELY":. Tali tejangjaba angjemtsü asoshi tangar Oshi nung agütsür: "when people are given too much power and control, they can become corrupt and abuse their position for personal gain. This can lead to negative consequences for the people they are supposed to serve, as well as for society as a whole".Tanishir temji khuret ka abentsü asoshi (TRUST), nuburtemi nungloka toktsüba pur-tem lir, shirnok dang (TRUSTEES) ta ajatsü akok.Saka parnoki, nüburtem-i yimlabaji mataloktet-tsüsa tim mesüi litetra/inyakra iba dangji BREACH OF TRUST ta ajatsü koka lir. Item ya Sorkar, Arogo-tem aser Mungdang-tem atema tekümdangtsu olen ka.

ABAM : ABAM,HQs: Impur nung toklang tenzükter-tem tenzükba kum 30 aser tasoba küm 60 koba tama tongdir mapa nungi anisüngzüktsü ta angazüker. Mungdangnung temelenshi tajung adokba züngshiba kar , nüburtemi bilemtet-tsü asoshi zülusemtsür :

- (i) 2013 Mungdang lemtetba kaji: "Tang nungi Arogotem nung Ter-Shilem aruba nungi 5 % (noklang shia pungu) ita shia Mungdang nem agütsütsü lemtet". Iba yagi inyakertem anisüngzük kanga angur ta angashir/zungshiogo.
- (ii) MISSION BACK TO VILLAGES , 2013 küm lemtetba nung mezüngbuba meraji "Pastor ita sen tajemba agi Rs.10,000 bosa agütsütsü. Arogo-temi mekokra ABAM-i enoksemtsütsü". Tanü , Arogo karbo, küm 100/125 abensaba Jubilee amongtsü mapang anasa arur mesura monger alitsüa akok, saka kilen ishikadang asüba agi (tatishitsu agi, kilen 25 shi),junga jaja-a moteti kanga timtema aliba karbo alitsü sudi.
- (iii) 2022 küm nungi "AROGO KATI AROGO KA ADOPT süa pei akokba lenmang balala nung Arogotem yaritep tenzükba" indang zülua angur. ABAM-i inyakba, temalen shia alibatem-ya Mungdangi adokba Kaket nungi kar agitetba. Headquarters nungi item ya mapang shia asadanga alitsü ta bilemer (needs evaluation from time to time).

Sorkari toklang tenzükertem atema kechisa inyaker, ishika lemsatepogo. Arogo-temi aser Mungdangtemi, Sorkar-i inyakba ajakjibo ajizüka mebenshitet-tsü. Saka Sorkar Service Rules-ji Arogo-tem aser Mungdang-tem asoshi Leniba Ajok/Mechi ama südaktsütet.

(Note-(ERRORS AND OMISSIONS EXPECTED).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Impur nung Asüngteta Alitsü Tesayuba training agiogo



Impur, Chiteni/July 27 (TYO): July 26, 2025 anogo nung ABAM YM ajanga ayonga ABAM Zone 1-7 asoshi Nüngdi Lanur Tesayurtem asoshi "Asüngteta Alitsü" tesayuba training ka Impur nung kanga takok ngua agiogo, ta ABAM Executive Secretary, Rev. Temsü Jamir-i sangdong ka ajanga metetdaksü.

Tanü alima tensa tia ajanga asen meimchirtemi bentet benteta aser merükteta alitsü mokokteti temenen nem atsür yoka taküm aika lendong ajuruba lir. Talisa, Tsüngremi meimchir nem agütsüba sempet tajung, koba asüngteta lia temeshi kiyima jentirena aotsü agüja lir, iba maongka tajung aikati mezüngmeshia shi jangraba nung amshiba ajanga Tsüngrem tsüngdang aibelen süa Pa tebilemba metongdaksür. Iba temenen mapa ajanga Lanur aika tim masüba lenmang nung asonger Tsüngremer sentong matalokdaksür. Tsüngrem nükjidong atalokdaksüba temoatsü aikati magitetba ngua, asüngteta lia Tsüngremer sentong atalokdaksür taküm sütettsü iba sentong agia arudar.

ABAM YM ajanga iba tesayuba kaket adoker tang agi tanabuba telok den iba sentong agiogo.

Sentong nung Shisalen sayurtemji Toshi Sanglir, Secretary, ABAM YM aser Teka Imchen, Coordinator, ABAM YM na liasü.

Ajak agi Arogo 36 nungi Associate Pastor Youth-i anir Nüngdi Lanur Tesayurtem 102 arua iba sentong nung aden.

Tsüngrem sentong angateta litetba lanur taküm aika adoktsü sarasadem ayur.

ICE-i Maryland nung pastor, Daniel Fuentes Espinal puogo



July 27, 2025: U.S. Immigration & Customs Enforcement-i Maryland nung tesüiba küm 20 dak tema alir pastor ka apuba sülen Louisiana nung aliba federal detention facility kati anir ogo, ta osang ka ajanga metetdaksü.

Arrshi küm 54 pastor, Daniel Fuentes Espinal ya Honduras nungi lir. Hombarnü Maryland kübok Easton jila nung ICE ketdangsertemi pa apu.

Iglesia del Nazareno Jesus Te Ama Arogo nung pastor Daniel-i Lowe nung kisüjensüba oset kar aliba sülen kisüba tesemi meyipa aoba mapang nung ICE-i pa apu.

ICE otongdari, "Fuentes-i ita 6 visa bener United States telungi ait saka pa tesüiba küm 24 tashi ozüng alema yangi alir. Visa mapang süiaka maneni yangi aliba ya ozüng alema inyakba aibelen ka lir," ta metetdaksü.

Pastor Daniela'er kibong nungita yaritsü atema GoFundMe campaign ka tenzükogo aser Honibarnep tashi nung dollar sen 29,000 bendenteta liasü.

GoFundMe campaign-i, "Pa US nung tesüiba küm 24 tashi alidang pai ozüng alema inyakba ken o ka danga mali. Easton jila tesem ajaklen pai sensakertem nem chiyungtsü, tejenokdak, süoshi aser senotsü teyari agütsübaji ajaki meteta lir. Tang pa apuba ajanga par kibong kanga aoksar aser jila nung pa dak metaloka alirtem jashir," ta metetdaksü.

Osangbener den jembdian Daniel'er jala, Clarissa Fuentes Diaz-i, "Kubui pa kechi kuli nung apuar mejangjai liasü. Ketdangser kati pa dang maitsü asüngdang aser merang agi pa teka alena liasü. Ajisüaka ketdangsertemi pa dang junga benshir ta pai shiogo," ta metetdaksü.

Espinal apuba sülen Salisbury nung anogo ka ayu, iba sülen Baltimore facility nung ayu. Mongolbarnü pa Louisiana nung aliba detention facility kati anir ogo.

Pa Louisiana-i anir aoba sülen pai maneni ICE agents densema tangartem den Khrista osangtajung lemsatepdar, ta par kibongi metetdaksü.

Par kibongi pa bail nung anizüksü atema attorney ka den inyakdar. Easton jila nung alirtema aikati pastor pusema shidi zülüogo.

Fuentes Diaz-i, "Kubu puer aoba sülen nungi kütsüi chi junga mechiyunger aser amoi junga maoer. Kübu chiyungtsü aser mozü shidak chidar asü machir, ta bilema la kanga shisabulur,"

ANOGO ABEN TSÜNGREM DEN

Aonung Sensaksem (T. Ken 77:1-6)

Mapang kar ammanji asenok dak alir. Tasü mait arudaktsür, aser asenok Asaph ama akümer, shibai ashi, "Kü timtemba anogo nung ni Kibuba bushir; aonungji kwika maneni songlaa liasü; kü nelai ani mesüngzüknü" (t.2). Ne nelai animesüngzüknü dang nai kechi inyaktsü ?

Asenoki kechi inyaktsüla Asaphi ashir. Mezüngbuba, "Kü nulai, oda Tsüngrem dang kü ola agi ni Tsüngrem dang ayimtener, aser Pai kü dang angashi" (t.1). Kari ashir, kodang na aonung memejangtetlir, san azüngdang nungi, Sannüker den jembidang. Asaphi yamaji inyak. Mapang mapang nung Kibuba dangi aotsü timtem adoker. "Ni Tsüngrem bilemtetter, aser shisa bulur" (t.3). Pa timatemtsüsa pai Tsüngrem indang kechi bilemtet? Tebilem nung ozüng ka nung tashi mangai alitsü mesüra tenangzükba ka nung arendaka alitsü. Mesüra pai Tsüngrem koda temeshi aser pa koda temenen bilemtetter alitsü.

Saka Kibuba den jembiba jagi tejangja angatetdaksür. "Ni alemli mapang, aki tendak, indang bilemdangogo" (t.5). Tanga o ka nung, Tsüngrem dak amangtsü akok. Ali mapang pai na anebalua liasü, aser na tarutsü indang pai anebalutsü.

Tanabuba, ne sasa den jembidang. "Ammang nung ni ken ken bilemtetter; ni kü mulungjang den jembir; aser kü nelai kümdanga bushir" (t.6). Kibuba indang ne sasa den jembidang. Ne taküm aser ne Khristan taküm jajaba tendangang. Ne tasü mait ken agi melentsütsü. "Ammang nung ni kü ken bilemtetter" (t.6).

Kodang na tasü meiti kümdar, ne nü k meketa aliba tia nung meyiper Kibuba dak ranglokang. Ne taküma tendangang. Nai Kibuba dang tashi mangai lir asü ? Pa den jembidang aser Pai na tasü itdakjang. Idangji ne sasa den jembidang aser ne sasa Tsüngrem mapa nung tasü itang. Pai ne nem amman nung ken ka agütsütsü.

Congo nung Islamic State-i Tenla ki amakdang nisung 21 tepset

July 27, 2025: Amongnü Komanda anasa Tenla ki ka Islamic State-i pusemba telok amakba mapang nung nisung kati Congo linük nung Tenla ki 10 tepset aser dokan kar ka amakba mapang nung rongdoktsü," ta metetdaksü. nisung 21 tepsetogo.

ADF ya Islamic State den Amongnü anepdang züngia sendaktepa aliba telok ka lir. 1:00 ako meta Allied Parnoki Uganda aser Democratic Force (ADF)-i Democratic Republic of Komanda nung aliba Catholic Congo arrtsülen mapang shia Tenla ki ka amak aser anasa aliba ki aser dokan-a aika 2002 küm Uganda rongdoktsü. sepaitemi ADF anema

Komanda nung civil society apusoba sülen parnoki anasa coordinator, Dieudonne aliba DRC-i oa liasü. Parnoki Duranthabo-i, "Tenla ki telung nisung meyrjang aika aser kima nung nisung 21 tepsetogo. 2019 küm parnoki khaset aser ki aika Islamic State den tesendaktep rongdoktsü," ta metetdaksü. yanglua liasü. ADF-i Congo

Ano Congo army-ia, nung Islamic sorkar "Prangpong amer telok kati amenoktsü meranger.

AO OSHI ANGAZÜKDAK:
TANÜ ANGAZÜKTSÜBA OJANG



Terülen

- (n) merüa aolen, tezülen (outskirts)
* Ozü ki yimti terülen lir.

Terümensem

- (adj) yim adena orr senden lia ken o lemtetba (meeting held at outskirts)
* Lanurtemi terümensem nung yimsüsür aitsütsü lemtet.

OLONG PAITEP # 7221

1				2				3		
										4
		5	6					7		
8				9		10	11			
			12							
13		14				15				16
17		18		19		20				
	21									

TIPLIN

1. Tepolung - 10
5. Tazüngtsü züluba - 5
7. Ozü tapu ka - 3
8. Anguba shilem - 5
10. Tera / Ishika - 3
12. Teben sobutsü - 5
14. Te _ _ _ gjem - 3
15. Moapu nung chiyimba shiruru - 5
17. Terok nungi adokba - 3
19. Temela masü - 5
21. Tesünep - 10

LANGTSÜNGLEN

1. Tepungba masü - 5
2. Taleptsü yin - 3
3. Rong tapu ka - 3
4. Yimsüsüba kümsük - 4
6. Mangyimba mapang - 5
9. Meimchir rongnung telemsa - 3
10. Atentsü asoshi mejemba - 3
11. Ana meta - 5
13. Inyaktet - 4
16. Sapisayang - 5
18. Tashi balaka - 3
20. Shishilembadang amshiba - 3

OLONG PAITEP # 7220 TELANGZÜBA

TIPLIN :

1. Pangka, 3. Aju, 5. Wai, 6. Lokti,
8. Sala, 10. Atamata, 13. Züin,
14. Akima, 16. Ano, 17. Ama, 18. Nungzü.

LANGTSÜNGLEN :

1. Penlok, 2. Awa, 4. Jakla, 7. Taten,
(tatentep), 8. Sutok, 9. Ama,
11. Anaknü, 12. Rünem, 15. Hon.

NAI-A YA METETTER MA



Alima nung democracy system ya mezüngbuba küm 2500 tejaklen Greece lima Athens nung tenzük. Ano alima nung 'governing body' tejentibaji 930 AD küm Althing, Iceland nung tenzük.

Assam: CM Himanta Biswa Sarma-i Uriamghat semdang



Guwahati, Chiteni/July 27 (Agencies):

Assam Chief Minister Himanta Biswa Sarma-i, Uriamghat nung sorkar ali atsünger aliba azüngtettsü asoshi sentong yanglua aliba tesem tawa semdangogo, aser iba tesem nung ozüng alema inyakysangshiba tali kuma aoba süoki ia bilemba lemsatepogo.

"Local temi ashiba agi, Uriamghat ya temesepba mozü shibelenba, motorcycle ayaba aser prangbong injang ayokdak tongtibang tesem ka kümogo," ta CM Sarma-i ashiba den sorkar ali atsünger aliba ya ozüng alema inyaksangshiba tesem teyongtsü ka kümogo.

Chief Minister ya helicopter ajanga Assam-Nagaland arrtsü nung Vidyapur tesem tonga aru aser drone amshia iba tesem anüing ajanga asadanga liasü. Anüing ajanga asadangba mapang mekazüka aliba arem ali nung kozü aika tema aliba ngutetogo, koba ozüng alema atsüngbatem lir.

CM Sarma-i iba ken o ya kanga süoki ia bilemba lemsatepogo. "Ali atsünger

alirtem indang list ya kanga talang lir, anungji ni taküm tepeyong Chief Minister inyakaka parnok ajak ya mintoktettsü memintoktettsü mejangja," ta pai ashi.

Chief Minister-i ashiba agi, Cachar, Sribhumi, Dhubri, Barpeta, Nagaon, Hojai, aser Morigaon densema Assam kübok district balala nungi nüburtem Uriamghat nung amenoker lidar.

Paisa, Bihar nungi migrant tem iba tesemi ogo. Paisa, district administration-i iba tesem nung alirtem ajak maitüsü jangjashitsü.

"Onoki tenüing aser address tem bendentsü. Parnok shitakba iba district nungi süra kecha tebiemtsü mali. Ajisüaka parnok permanent resident tem mesüra anintsü," ta pai rasa ashi.

District administration-i sorkar ali atsünger alirtem ainshitsü tetuyuba agütsüogo. Ajisüaka CM Sarma aruba sülen ali atsünger alirtem aika adenshi aser compensation, security, aser rehabilitation meshitsü atema senden ka

ametsü mepeshia liasü.

Tetsürtem kari CM den ajuruteptsü atema police-i tenokdangba agütsür aliba ajanga aotsü merangba sülen tensa mejungi aküm. Police-i parnok sot aser iba ajanga mapang tatsüka mangatettep adoka liasü.

Lisopurtem nem rehabilitation densema teyari ajak agütsütsü ta ketdangsürtemi nangzükba sülen tensa süngjema liasü. CM Sarma-isa, lisopurtem dang kecha shisamebulutsü metetdaksüogo.

Uriamghat nung ali azüngtettsü atema sentong yanglur aliba ya Assam nung arem ali aser sorkar ali atsünger aliba meyipa agitsü atema inyaktepbba nung shilem ka lir.

Kasa mapang nung Guwahati kübok Adingiri Hills nunga ali atsünger aliba osang sangdongogo, kong ozüng alema iba tesem nung alirtemi iba tesem nüngja Kudratpur" ta melentsüogo. Iba tesem nung alirtem danga ali azüngtettsütsü tetuyuba agütsüogo.

Meghalaya nung asangur chanu kati teti tepset

Tura, Chiteni/July 27

(Agencies): Meghalaya nung Tura kübok Chitoktak tesem nung Hokolbarnü arishi küm 17 tain asangur chanu kati teti bu agi tepseta liasü. Tena tsüngda mangatettep adokba sülen iba ya atalok.

Osang ajanga ashiba agi iba lendong atalokba mapang

tanobusang ya yi jemer liasü.

Aija alisang ya Deran Gittim, Chitoktak nung alir aser pa yi jemer tetsü aser tangar den asatepba mapang iba lendong ya ataloka liasü. Mangatettep adoka asatepba mapang pai teti tambusang Jekil M Sangma dak bu agi soktsü aser pa kanga mejungi yiruja liasü.

Jekil M Sangma ya Tura Civil Hospital-i aritepa anir ao saka mozükidang doctor temi pa tasü bener aru ta sangdonga liasü. Iba lendong atalokba sülen tanibusang ya jena ao saka par kinungertemi Honibar anepdang Chandmary Beat House-i anir aruogo, ta osang ajangsa metetdaksü.

Manipur police-i brown sugar seret 2.3 apu

Imphal, Chiteni/July 27

(Agencies): Churachandpur district nung temesepba mozü shibelenertem anema jenjang agiba mapang Manipur police-i ano nisung ana pua ajak senteper nisung pezü puogo, ta ketdangsürtemi Deobarnü metetdaksü.

Itangitertem osang dak ajemdaker Manipur Police anti-drug smuggling unit-i taoba ghonda 44 tesem balala meitaogo.

Meita aoba mapang police-i soap cases 156 nung sepa aliba brown sugar seret 2.3 nguteta liasü, koba

Myanmar nungi bener aru asütsü ta bilemer. Iba temesepba mozü ya international black market nung sen crore 10 alang asütsü ta amanger.

Hokolbarnü apuba nisung ana nungi osang agiba dak ajemdaker Honibarnü meita aoba sentong benoka liasü, ta police-i ashi.

Honibarnü meita aoba mapang Thadou Veng, Singat nungi Peter Haokip, 33 aser Changlei Veng, Molnom yimtsüing nungi Lhunkholal Haokip, 23 pua liasü. Tena ya Behiang Police

Station kübok Sehken yimtsüing nung pua liasü.

Police temi Hokolbarnü mezüngbuba Hausuanlal Phiamphu apu aser pa ket nungi brown sugar gram 168 nguteta liasü.

Pai osang agütsüba dak ajemdaker Thongkholui yimtsüing nungi Lamminlal Haokip, 33 ya anogo ka lir Khenjang yimtsüing anasa apu.

Aija alir pezüprongla ya Narcotic Drugs and Psychotropic Substances (Amendment) Act, 2023 kübok aitsüogo.

Malaysia nung Thailand aser Cambodia ceasefire atema jembitsü

Surin, Chiteni/July 27 (Agencies): Tsükchitep tembangtsü atema jembishinütsü asoshi Thai aser Cambodia lenirtem Malaysia nung ajuruteptsü, ta Thai ato kilonser office indang odongtari Deobarnü ashi.

Malaysian Ato Kilonser Anwar Ibrahim-i region nung yimjung alitsü asoshi jembishinütsü jaokba nung Acting Prime Minister Phumtham Wechayachai adentsü, ta ashi.

Iba senden nung Cambodia Ato Kilonser Hun Manet adentsü, ta odongtari ashi saka Cambodia tsütsü nungi osang agüja mali.

Iba rara ya tenüker anogo pezü buba lir, aser nisung 34 tepsetogo aser 168,000 dak tema pei ki yutsür tesem balala nung jenoka lir.

US Tir Donald Trump-i Honibarnü pa indang Truth Social nung Thailand aser Cambodia lenirtem den jembiogo ta ashi aser tsükchitep manenra linük anaprong den trade agreements indang mejembitsü ta ashi. Mapang tatsüka lir paisa linük anaprongi jembishinütsü asoshi ajuruteptsü mulungogo ta ashi.

Cambodia Ato Kilonser Hun Manet-i "tangsa aser condition kecha makai ceasefire alitsü" asoshi

inyaktsü ozü linüki mulunga lir, ta Deobarnü ashi. Acting Thailand Prime Minister Phumtham Wechayachai den Trump-i sensaksemba sülen Thailand-i amakba anentsü Trump-i pa dang shiogo ta ashi.

"Ibai linük anaprong sepai aser nüburtem asoshi osang tajung lir," ta Hun Manet-i sangdong ka nung ashi.

Pai pa indang deputy, Foreign Minister Prak Sokhonn dang iba sülen mera agitsü asoshi U.S. Secretary of State Marco Rubio den angatetteptsü aser ceasefire asoshi Thailand foreign minister den jembitsü nungloksüogo ta ashi.

Phumtham-ia Trump dang pelaba ashi aser ceasefire asoshi Thailand-i 'principle' nung mulunger saka Cambodia nungi süoki ia agitsü nüngdaker ta ashi. Yimjung pangzüng ka asoshi mera tajung agitsü atema tekeraba nung linük ana tsüngta jembishinü akatsü Phumtam-i ayongzüker, ta Thai Foreign Ministry ajanga ashi.

Brehostibarnü arütsü nung land mine ka poka Thai sepai pongu yiruba sülen rara ya tenzüük. Rara tenzüükba atema linük anaprongi tai tongloksüteper. Linük anaprongi pei ambassadors tem meyipa jaogo aser Thailand-i Cambodia den par arütsü alema senzüba tesemtem shibanga lir.

Yimtenren tsütsü nungi tesendaktep asoshi inyaktepaka arütsü tesem kar nung Deobarnüa maneni rara liasü, aser asendenshir injang khaloktsüba aser sepaitem senzüba asoshia tenüng senteper.

Thai army indang odongtar Col. Richa Suksowanont-i ashiba agi, Deobarnep Cambodian sepaitemi Surin province nung civilian tem ki nung densema injang-bomb tesashi khaloktsü. Cambodia-i Ta Muen Thom temple nunga tenük yoker rocket khaloktsü ta pai ashi, koba linük anaprongi rakteper. Thai sepaitemi Cambodian artillery aser rocket launchers dak long-range artillery khaloktsü.

Trump tetsüngtai aittsü merangba ya ken o balaka lir. Cambodia-i anir jembishinü tenzüükba sülen ang ceasefire alitsü, ta Richa-i ashi.

Külen Thai sepaitemi tanks aser ground troops dena tesem aika nung ozü litsü alema aitba sülen Deobarnep Cambodia litsü nung bomb pokloksü, ta Cambodian Defense Ministry odongtar Lt. Gen. Maly Socheata-i aitsü.

Thailand nung Deobarnü sepai ka asüba osang lir, anungji iba rara tenzüker asüba nisung 21 ajunger. Cambodia-ia nisung 13 tepsetogo ta ashir.

Sudan indang paramilitary ajanga sorkar ka kumteter

Cairo, Chiteni/July 27 (Agencies): Sudan nung kanga junga meteta aliba paramilitary telok ka aser par den sendaktepa telok temi par kübok aliba tesem nung sorkar ka kumtetogo ta ashi, koba linük anüolen Darfur region nung lir aser war crimes aser meimchir anema mapa tamajung inyakba bushisüngdang asür.

Honibarnü iba osang sangdongya yagi Sudan nung mepetmesü tamajungba ang akumtsü südi, kong linük indang mitkar aser paramilitary Rapid Support Forces (RSF) tsüngta April 2023 nung linük yimtiba Khartoum aser tesem balala nung rara tenzüka lir.

RSF-i aliba Tasis Alliance ajanga paramilitary telok indang commander Gen. Mohamed Hamdan Dagalo ya administration tasenba nung head of sovereign council ama shim. Züngsem 15 aliba council ya head of state ama inyaker.

RSF ya mapa tamajung inyakba nung nüngtugu akumba Janjaweed militias nungi rentetba lir, koba küm 20 shi jakdang tir inyaka alisang Omar al-Bashir-i Central or East African in Darfur ta jangjatetba nütsüng anema anidena liasü. Janjaweed yagi nisung aika tepset aser tashiyim mapa balala inyak ta tai tonglokja lir.

Tang rara nung RSF ajanga tashiyim mapa zünger mezüngmai inyaker ta tai

tonglokja lir. Taoba US tir Biden administration ajanga Dagalo nem tenokdangba agüja RSF aser par proxy temi kin ajunga samatsütsü meranger ta tai tonglokja liasü. Ajisüaka RSF-i yamaji meinyak ta ashir.

Alliance odongtar Alaa al-Din Naqd-i administration tasenba osang ya Darfur kübok Nyala yimti nungi video ka ajanga sangdong, koba RSF aser par allied Janjaweed kübok lir.

2019 küm al-Bashir atsüngdokba mapang Sudan nung yimsü süa aliba military-civilian sovereign council nung züngsem süa alisang civilian yimsüsür Mohammed Hassan al-Taishi ya RSF-i azüoka aliba sorkar indang ato kilonser ama inyaktsü.

Southern Kodrofan region nung kanga yakyaka aliba Sudan People's Liberation Movement-North (SPLM-N) indang tekolakba Abdelaziz al-Hilu ya council nung Dagalo indang deputy asütsü. SPLM-N ya SPLM nungi razüka aliba telok ka lir, koba South Sudan nung sorkar kumteta aliba party ka lir.

RSF kübok aliba tesem nung parallel government amenoktsü nükjidong nung February ita Kenya yimtiba Nairobi nung RSF aser par allies temi charter ka nung meyongnem agütsür ita pongu lir iba osang ya sangdonger.

Gaza telungi teyari oset yoktsü lenmang lapoktsütsü: Israel

Jerusalem, Chiteni/July 27 (Agencies): Linük balalai hopta aika ajungshia aser yasa-tzüra timtem tulu lir ta tekum dangtsü shia aruba sülen Israel mitkari Gaza Strip telungi teyari oset yoktsü atema humanitarian corridors lapoktsütsü ta ashir.

Deobarnü sangdong ka nung Israel Defense Forces (IDF) ajanga tesem asem nung humanitarian atema mitkar inyaksangshi anena atatsü sangdong.

Israel-i Gaza nung tayimtsü amshia am, shini aser pongdang nung sepa aliba talep tenet tsükdaktsüogo ta ashiba sülen iba sangdong ya agütsür.

Nisung million ana aliba territory telungi ita aika teyari oset kanga ajema odaktsüba ajanga Israel dang teyari oset tali yoktsü ayongzüükba tali akumer. Gaza nung alirtem asaa yasa-tzüradaktsür ta ashiba Israel-i magizüker.

Palestine ketdangsür temi humanitarian corridors sentong mesüra Gaza nung tayimtsü nungi chiyongtsü tsükdaktsüba indang kecha shia mali.

IDF ajanga ashiba agi, UN

aser danga telok balalai Palestine nunger nem chiyongtsü aser mozü agütsüdaktsütsü asoshi Gaza nung aid convoy atema humanitarian corridors lapoktsü. Item lenmang ya anepdang 6:00 ako nungi aonung 11:00 ako tashi lapoktsü.

Mitkar inyaksangshi anena atatsüba ya tesem asem - Al Mawasi, Deir al-Balah aser Gaza City - nung anogoshi anepdang 10:00 ako nungi aonung 8:00 ako tashi alitsü, ta IDF ajanga ashi.

Gaza nung chiyongtsü tebilemetsü tuluba akumba atema US aser danga teyari agütsüba lokti aser Israel tembar linük kari par tenüng asener aser tenokdangba makai teyari yoktsü ajungshia arur.

UN indang humanitarian chief Tom Fletcher-i teyari atema humanitarian pause sangdongba ya pela agizüker ta ashi.

"Yasa-tzüra alir timtiba nem iba teyari agütsütsü asoshi oaki aliba asen team den jembishinü sütar," ta pai ashi.

Deobarnü tangokba noksa

tem nung Egypt den Gaza indang Rafah arütsü nung teyari oset bena aliba gari tulu aika iba linük telungi aitsü atateba aliba nguogo.

Hamas meyong health ministry ajanga nisung aika achi-ajemtsü agi meperiba ajanga tasür lir ta ashir. Rara tenzüker achi-ajemtsü agi meperi asüba nisung 133 lir aser timba taoba hopta ishika tsüngta asüba lir ta parnoki Deobarnü ashi.

World Health Organization (WHO) chief, Tedros Adhanom Ghebreyesus-i Gaza nung chiyongtsü tebilemetsü ya nisungi yangluba lir ta ashir.

Gaza nung alir nem chiyongtsü lema agütsütsü ya UN aser international aid organisations dak keta lir, saka parnoki item teyari ya Hamas ket metongdaktsütsüla, ta IDF-i ashi.

Deobarnep IDF-i international organisation den teka amteper aser Cogat-i anir teyari osettem anünglen nungi tsükdaktsü ta ashi. Cogat ya Israel mitkar telok ka lir aser iba telok yagi Gaza telungi teyari oset yokba

ketdang asür.

Deobar nokongdang Israel mitkar-isa Gaza nung desalination plant ka nem power supply agütsü tenzükshir aser iba yagi nisung 900,000 shi nem tajemtsü tzü agütsütsü ta ashi.

Israel-i March ita tetenzük nungi Gaza nem teyari agütsüba lenmang ajunga nokdang aser May ita nungi ano tenokdangba tasen agüja liasü.

US den külemi parnoki Gaza Humanitarian Foundation (GHF) yarir aser Gaza nung parnok ajanga chiyongtsü lema agütsüdaktsür.

Ajisüaka May ita tatemlen nungi GHF ajanga chiyongtsü lema agütsü tenzüker anogoshi amai Palestine nunger chiyongtsü bushirtem tepsetba osang lir. Tenük kuli alirtemi Israel sepaitemi parnok dak injang khaloktsü ta ashir. Ajisüaka Israel sepaitemi tekum dangtsü atema injang khaloktsü ta ashir aser nisung asüba ya tai ta ashir. Parnokibo Hamas-i ang aid points anasa rongrongshirong adokdaktsür ta ashir.

Gaza nung tayimtsü amshia teyari oset tsükdaktsütsü ya UK-i yarisema Jordan aser UAE sentong agizükba sülen inyaker amai ajiteter. Ajisüaka iba ama maparen yagi Gaza nung yasa-tzüraaba kangabo mesuneptsü ta ashir.

UN indang Palestinian refugee agency (UNRWA) tekolakba, Philippe Lazzarini-i anünglen nungi chiyongtsü tsükdaktsüba nung rongsen jenti lalur, meperir aser shidak meinyakra yaseta aliba civilian tem tepsettsü ta ashir.

UNRWA indang teyari oset trucks 6,000 jungnüa Jordan aser Egypt nung Gaza telungi aitsü ataa lir, aser Israel-i sapanga aliba agientsüla, süngkum lapoktsüla aser parnok senzüsempongba nung lendong magütsütsüla, ta Lazzarini-i ashi.

Hamas-i anir October 7, 2023 nü Israel south tsütsü maka nisung 1,200 shi tepseter nisung 251 pua bener aoba nung langzüa Israel-i Gaza nung rara tenzüük.

Iba sülen Gaza nung nisung 59,000 dak tema tepsetogo, ta Hamas meyong health ministry ajanga ashir.

DC Open: Leylah aser Anna nati takok angu


Chiteni/July 27, 2025 (Agencies): Canada tsürtem rongnungi nüngtugu tennis asayar Leylah Fernandez-i Deobarnü Elena Rybakina akokba sülen DC Open final tongtetogo.

Tanga semifinal asaya ka nung Anna Kalinskaya-ia Britain tsür Emma Raducanu koka final tongtetogo.

Mezüngbuba semifinal asaya nung Fernandez-i 6-7, 7-6, 7-6 agi kanga meranga asayar Rybakina madak takok angu aser Kalinskaya-i 6-4, 6-3 agi straight sets nung Raducanu koka liasü.

"Asaya kanga melarabo masü asü. Tetenzük nungi tatembang tashi kanga toktepa asayaogo. Tongtibang mapangtem nung ni takok nguteta liasü," ta Fernandez-i takok anguba sülen ashi.

Fernandez aser Rybakina na asaya ya ghonda asemser minute terpongu asaya aser Canada tsürta yagi set



Leylah Fernandez



Anna Kalinskaya

asemprongla nung tie-breaker asayaba sülen asaya koka liasü.

"Ni takok tashi kü coachi-kechi ashir aji anga asayatsü merang aser tali mebilemtsü meranga liasü," ta Fernandez-i ashi.

"Ni tanü stretcher nung bener tugutsüsa kümra yamaji südakja saka ni takok tashi meranga asayatsü dang bilema liasü," ta laisa shisem.

Pei tata semifinal akokba sülen Fernandez aser Kalinskaya na final asayatsü lir. Tena tang tashi nung khen danga asayar lir aser aji Fernandez-i koka lir.

Kasa asayamung tebur kija asaya nung Alex De Minaur-i Corentin Moutet-i kokogo aser Davidovich Fokina-i America nunger asayar Ben Shelton kokogo. Tena final asayatsü.

Nagal, Yuki Davis Cup team nung denogo



Sumit Nagal



Yuki Bhambri

Chiteni/July 27, 2025 (Agencies): Sumit Nagal aser Yuki Bhambri na Switzerland den World Group I first-round asaya atema India Davis Cup squad nung denogo, koba Biel nung September 12 nungi tenzüka asayatsü.

2023 küm Morocco den tatembangbuba asayaba sülen Nagal tang mezüngbuba Indian Davis Cup squad nung denogo aser Bhambri-ia asaya ana atonga masayaba sülen tang team nung denogo.

India nunger rongnungi kija asaya nung temaba jenjang nung alisa Nagal, taküm küm tetenzüklen Pakistan den asayaba mapang

masaya aser iba sülen Sweden aser Togo na dena masayai liasü. Pa tang asaya aliba season nung junga masayateti arudar aser pa world rankings nung jenjang 306bubai asepzüka luogo. Italy nung Trieste Challenger asayaba mapang semifinal tonga asayaba ya pa asoshi 2024 küm tajungtiba asayaba liasü.

Kija asaya nung Nagal den Karan Singh (403) aser arishi küm 19 tain Aryan Shah (442) na asayatsü. Sasikumar Mukund (463) aser Dakshineshwar Suresh (790) na reserve asayar ama shimogo.

Bhambri shiba tang India nunger tarep asayartem

rongnung temaba jenjang nung lir, pa N Sriram Balaji (75) den longjemer asayatsü aser Rithvik Bollipalli (77) tarep asaya atema reserve asayar asütsü.

Bhambri India tenüng nungi tatamsa February ita Pakistan akokba asaya nung asaya liasü, saka pa Sweden aser Togo den masaya.

Captain Rohit Rajpal-i ashiba agi, Biel nung asayaba mapang asayartem form, fitness aser match sharpness dak ajemdaker tatembangbuba team shimtsü.

Ramkumar Ramanathan team nung meshim aser asayar shimertemi ashiba agi pa tang form nung mali. Squad ya Nandan Bal-i anir AITA selection panel-i shima liasü.

India aser Switzerland na asaya tang tashi nung India-i anaben aser Switzerland-i khen koka lir aser tena tatamsa 1993 küm asayaogo, koba India-i Calcutta South Club nung 3-2 agi koka liasü.

Indian Squad vs Switzerland

Kija asayar: Sumit Nagal, Karan Singh, Aryan Shah
Tarep asayar: Yuki Bhambri, N Sriram Balaji

Reserves: Dakshineshwar Suresh, Sasikumar Mukund, Rithvik Bollipalli.

Mokokchung District Football Association office mesemogo

Mokokchung, 27 (TYO): Mokokchung District Football Association (MDFA) otsü nung tapak tasen ka asütsüsa 26th July, 2025 nü MDFA office mesemogo. Iba office-ji Mokokchung Municipal Council, Chairman, Imkongchuba A-i meraketa lapoktsü aser Ungma Baptist Arogo, Assoc. Pastor (W), Rev. Talijungla-i meshitetsü. Iba office ya Imkongmeren Sports Complex, Mokokchung nung District Youth Hostel süpeter aliba nungto first floor nung mesema lir.

Sentong nung MMC Chairman, Imkongchuba-i jembidang, Mokokchung nung 'football academy' ka bener arutsü mapang tongogo aser iba mapaji MDFA-i achayanga inyakdaksünür, ta ashi.

Paisa tesüiba mapang MDFA-i Mokokchung district nungi sempet aketer jenti adokdaksüba asoshi pelaba den ano tang ketdangsürtem dak nükla tajung angur, anungji, jenjang (level) balala nung footballer jenti adokdaksütsü mangdang yur inyaksü ayongzüik.

Tang MDFA-i sempet

aketer anitentsü asoshi tera tonga ia maparen balala inyakba den ano mapang shia coaching balala ayonga akaba angudang kanga pelar, item mapa jagi tarutsü teimla tajung sayur, ta paisa ashi.

MDFA-i kümshi MDFA Trophy ayonga akaba ajanga lanurtem nem sabang lapoktsüba den sempet aketer jenti adokdaksüdaki, tang tashi kanga junga ayonga arudar, saka MDFA ya "MDFA trophy" ayongba telok ka dangbo mesüdaksünür, ta paisa iba dang alia awa oa inyaksü ajungshi.

MDFA office lapokba yagi alizüng ka atongba dang masü iba ajanga tongtepratep tajungba, tekaraba, maparen tajungba aser tejakleni apusotsü teimla sayur, ta paisa moatsü.

MDFA tir, N. Akok Longkumer-i tarur ajak pela-a agizük aser iba sentong nung MDFA tongti zülür, Supongasang Jamir menden liasü. MDFA ya 1992 küm Mokokchung nungi football asaya tsütsü sempet aketer tem ajungshiba den lenman balala sayua anitetsü mangdang yur tentetba lir.

World University Games: Seema-i 5000m nung silver medal angu

Chiteni/July 27, 2025 (Agencies): India tsürtem rongnungi asemteper Seema-i otsü tasen ka yanglua la ya India tsürtem rongnungi World University Games nung 5000m asemtepba nung medal ka anguba mezübuba asayar kümogo.

Seema shiba ketdangsürtem makümba ajanga 10,000m asemtepba nung shilem magiteti liasü, lai 5000m asemtepba nung ya tang mezüngbuba senior asaya nung silver medal ka nguogo.

Seema-i alizüng 15:35.86 nung tongtet, koba iba asaya nung lai alizüng takaratiba tongtetba rongnung tanabuba lir.

Rhine-Ruhr, Germany nung tang asaya aliba asayamung nung India badminton team-i broze medal angu, saka India nunger ketdangsürtemi July 16 nü manager tem senden amenba mapang asayar tenüng shitak magütsüba ajanga asayar 12 shimer aliba nungi trokbo asayatsü temelaba magütsü.

India nunger archer temi



Honibarnü World University Games nung medal pongu ngua kanga junga asayaogo.

India team-i tarep temeyoktep asaya nung gold medal, tebur team-i silver aser tetsürtem team-i bronze medal anguba den compound events kija asaya nung Jadhav-i gold medal aser Praneet-i silver medal ngua liasü.

Iba den bendenloksema arishi küm 24 tain asayar Praveen Chithravel-i triple jump asaya nung 16.66 metres pongteta silver medal ngua liasü.

BILEMDANGANG

"Takok angutsü atema tamakokjia kanga tongtibang."